

**POSIBLES IDEAS PARA  
UNHA HOMILÍA CON NENOS  
22 DECEMBRO 2019**

**Como Xosé e María *ACOLLAMOS* o AMOR.**

**1. Ver: Os sinais do Nadal.**

-Temos moitos sinais que nos indican que o Nadal está moi preto: as vacacións, a luces nas rúas, a decoración das prazas, o nacemento no cole ou na parroquia, xa sabemos a onde imos ir eses días, a ilusión polos agasallos. -Pero debemos preguntarnos: se os Reis non nos trouxesen o agasallo que queremos..., se non puxesen luces ou beléns, se só nos fixamos no material e en consumir...

***Seguirá sendo Nadal? Cando haberá Nadal?***

**2. XULGAR: Hai Nadal cando facemos como María e Xosé.**

-O profeta Isaías dános un sinal: ***“Mirade: a virxe está encinta e dá a luz un fillo e poñeralle por nome Emmanuel”***. No evanxeo fálasenos das **dúvidas de Xosé** para aceptar a María e a Xesús. Pero o anxo disipa, aclara, as súas dúvidas: María ***“dará a luz un fillo, e ti poñeraslle por nome Xesús, porque el salvará o seu pobo” e é o Deus-con-nós***. María acepta ser a súa nai, e confía.

**QUE NOS QUERE DICIR XESÚS?**

En Nadal non celebramos o nacemento de Papá Noel... Nace Xesús... **A mensaxe deste domingo é que *ACOLLAMOS O AMOR* (a Xesús) como Xosé e María.**

**-PREPARÉMONOS COMO XOSÉ:** Xosé escoita a mensaxe do Anxo e fíase de Deus, acepta a súa vontade cambiándolle de plan e acollendo a María e a Xesús.

\*o mesmo se nos pide a nós: deixar ruídos, distraccións, o consumismo de nadal, o máis cómodo e deixar entrar a Xesús na nosa vida, estando máis con el, dedicándolle tempo, cambiando aos plans de Deus...

**-PREPARÉMONOS COMO MARÍA: Maríaponse en camiño, vai a Belén, confía en que, malia ir tan lonxe e non atopar máis que unha cova, Deus non a vai abandonar.**

\*o mesmo se nos pide a nós: confiar en Deus, saber que el non nos vai a fallar, que sempre podemos contar con el.

**-ACOLLAMOS O “AMOR” (A XESÚS):** Cando eu era neno, un ancián colocoume sobre os seus xeonllos e díxome: *“Vouche a desvelar un segredo. Nin o ceo nin a terra son suficientemente grandes para conter a Deus, só o corazón humano é bastante grande para albergalo”*. Acollámolo no corazón co silencio (hai demasiado ruído), a oración (abre o teu corazón ao misterio de Deus) e a tenrura (na tenrura de Deus neno acollemos toda a tenrura e proximidade de Deus).

### ***Como podo acoller a Xesús este Nadal?***

### **3. ACTUAR: Descubramos o sinal do amor de Deus.**

**-Que non vos pase desapercibida a chegada de Xesús, que non nos colla de vacacións, despistados noutras cousas.**

**-Acendemos a 4ª candeia, a da acollida a Xesús. -Descobre o plan “b” de Deus para ti:** quere ser o protagonista do teu Nadal, entrar na túa vida, cambiarche o corazón, ser o Deu próximo, só fai falta confiar (ter algo de fe) e acoller.

**-Preparamos panxoliñas, belén** (colocando o neno Xesús o 24), o belén vivente, imos polas rúas con panxoliñas e estrelas “naceu Xesús”... **-Organizamos a campaña solidaria de Nadal.**  
**-Este domingo os nenos poderían traer á misa o Neno Xesús dos seus beléns e bendícense todos. -Bendicimos a cea de Noiteboa.**

***Que imos facer?***

# A PALABRA

**ISAÍAS 7, 10-14: *Mirade , a virxe está encinta.***

Naqueles días, o Señor falou a Ajaz e díxolle: «*Pídelle un signo ao Señor, teu Deus: no fondo do abismo ou no alto do ceo*».

Respondeulle Ajaz: «*Non o pido, non quero tentar o Señor*».

*Entón díxolle Isaías: «Escoita, casa de David: Non vos abonda cansar os homes, que cansades ata o meu Deus? Pois o Señor, pola súa conta, daravos un signo.*

***Mirade: a virxe está encinta e dá a luz un fillo, e poñeralle por nome Emmanuel***».

*Palabra do Señor.*

**SALMO 23:**

**R/. Vai entrar o Señor; el é o Rei da gloria.**

**ROMANOS 1, 1-7: *Xesucristo, da estirpe de David, Fillo de Deus.***

**SAN MATEO 1, 18-24: Xesús nacerá de María, desposada con Xosé, fillo de David.**

**Narrador:** A xeración de Xesucristo foi deste xeito: María, a súa nai, estaba desposada con Xosé e, antes de vivir xuntos, resultou que ela esperaba un fillo por obra do Espírito Santo. Xosé, o seu esposo, como era xusto e non quería difamala, decidiu repudiala en privado. Pero, apenas tomara esta resolución, aparecéuselle en soños un anxo do Señor que lle dixo:

**Anxo:** -«*Xosé, fillo de David, non temas acoller a María, a túa muller*, porque a criatura que hai nela vén do Espírito Santo. Dará a luz un fillo e ti poñeráslle por nome Xesús, porque el salvará o seu pobo dos pecados».

**Narrador:** Todo isto sucedeu para que se cumprise o que fala dito o Señor por medio do profeta:

**Profeta:** -«Mirade: a virxe concibirá e dará a luz un fillo e poñeránlle por nome *Emmanuel, que significa “Deus-connosco”*».

**Narrador:** Cando Xosé se espertou, fixo o que lle mandou o anxo do Señor e acolleu a súa muller.

*Palabra do Señor.*

(Narrador-Anxo-Profeta).